

Ugovor o koncesiji za izgradnju i korištenje Vjetroelektrane Ivan-sedlo - Hadžići sa 12 vjetroagregata po 2,1 MW instalisane snage, danas su u Tarčinu potpisali Ministar privrede Kantona Sarajevo Muharem Šabić i prokurista Privrednog društva Suzlon Wind Energy BH d.o.o. Pedersen Erik Winther.

Kanton Sarajevo je kompaniji Suzlon Wind Energy BH dao koncesiju na 30 godina, a vrijednost projekta je 58.674.900 KM.

“Ovo je najveća koncesija ikada data u Kantonu Sarajevo”, kazao je ministar Šabić i dodao da će nastaviti stvarati povoljno poslovno okruženje, a to podrazumijeva i bolju administraciju kako bi investitori mogli imati brži pristup i pravnu sigurnost za investicije. Naglasio je će od projekta vjetroelektrane imati benefite lokalna zajednica i to 60 posto, a Kanton Sarajevo 40 posto.

Ono što predstoji, kako je pojasnio Pedersen Erik Winther je prikupljanje građevinskih dozvola, a nakon toga će početi inženjerski radovi, ispitivanje tla, gradnja prilaznih puteva. “Radit ćemo na kreiranju novih radnih mjesta, radit ćemo i na tome da ljudi žive u blizini vjetroparka”, kazao je Pedersen i napomenuo da je ovo također i ekološki prihvatljiv projekt, a lokacija je pogodna za gradnju vjetroelektrane jer je prosječna brzina vjetra 7,7 m/s.

Načelnik Općine Hadžići Hamdo Ejubović i direktor Suzlon Wind Energy za Balkan Samir Džaferbegović su kazali da je u interesu svih da se što prije krene sa realizacijom projekta, stoga će proces dobijanja potrebnih građevinskih dozvola biti ubrzan kako bi investitor mogao da gradi, jer kada se izgradi i krene proizvodnja, tada će i prihodi krenuti.

Izvor: energetika.ba